

# SANCTO ALOYSIO GONZAGAE

STUDIOSAE JUVENTUTIS PATRONO

S E S U A S Q U E

PHILOSOPHICAS THESES


PUBLICAE PROPUGNANDAS

JOANNES PAULUS MAGGI

PRATENSIS COLLEGII CICONINII CONVICTOR

D. D. D.

Data post tertium pro arbitrio venia opponendi.



FLORENTIAE MDCCLXV.  
EX TYPOGRAPHIA PAPERINIANA.

*Praefidum Adprobatione.*

CLEVELAND OTOMAR

H A D A R M O O

OF THE STATE OF OHIO

IN THE YEAR 1877

OF THE COUNTY OF CUYAHOGA

IN THE YEAR 1877

IN THE COUNTY OF CUYAHOGA


IN THE YEAR 1877

IN THE YEAR 1877

IN THE YEAR 1877


IN THE YEAR 1877

IN THE YEAR 1877



# EX LOGICA.



- I.  T jure dici possit Logica, *Arts cogitandi*, quaelibet cogitationis species dirigenda ab eâ est, nec aliud habebit objectum, nisi rectas operationes mentis, quas ad verum investigandum hoc pacto dirigit, ac parat:
- II. Prima autem cogitationis species apprehensio dicitur: Haec autem, sive sensuum ope in nobis fit, sive per metam Animae reflexionem, & saepe etiam voluntariam: illa propriiori vocabulo sensatio dicitur, seu etiam idea directa, haec idea reflexa: illa utpote necessaria dirigi nullatenus potest, haec dirigibilis est, & dirigitur a Logicâ.
- III. Ideae reflexae, quae a Logicâ prae reliquis diriguntur, sunt Ideae praecisivae, quibus per abstractionem mentis a multiplicitate praescindimus, vel ab unitate, cum nempe per partes, & quodammodo per gradus ad objecti cognitionem ascendimus, donec ad ipsius essentialem, & metaphysicam definitionem deveniamus.

- IV. Hujusmodi autem Ideas conformes non esse cum objectis suis affirmamus, saltem secundum modos, quos illae in objecto exercitè repraesentant: per eas enim objectum indistinctum in se, & omnino unum menti sistitur, ac si distinctum esset, & multiplex.
- V. Difformitas autem hujusmodi Idearum ab Objectis suis in nullum nos inducet errorem, si, ut oculorum fallacias per leges Opticae, sic mentis nostrae imbecillitatem per praecepta Logicae corrigere noverimus.
- VI. Hinc, ut nostra fert opinio, cavendum omnino, ne inter gradus Metaphysicos, ut ajunt, ejusdem individui creati, ullam judicemus adesse distinctionem, vel formalem ex naturâ rei, vel virtuales intrinsicam, solâ contenti formali per intellectum; quae licet perutilis sit ad scientiarum comparisonem, est tamen propria intellectus imbecillis, & finiti. Hinc in intellectu Divino nullae sunt abstractiones, nullae hujusmodi distinctiones.
- VII. Altera cogitationis species appellatur Judicium, seu Propositio, estque actus, quò Ideas, vel adfirmando conjungimus, vel negando sejungimus: qui quidem actus simplex est, & ad Intellectum pertinet, non ad voluntatem, ut censent Cartesiani.
- VIII. Cum rerum Ideas ita adfirmando conjungimus, ut objectis iis, quibus conveniunt, aptemus, & ab iis, quibus repugnant, negando separemus, judicia vera sunt. Hinc veritatem formalem judiciorum nostrorum in ipsorum conformitate consistere cum suo Objecto affirmamus.
- IX. Veritatis proprietas, quae potissimum hic consideranda occurrit, est certitudo: quae alia immediata est, alia mediata. Certitudo immediata est illorum propositionum propria, quae per se ipsas notae nobis sunt: Mediata vero illarum, quae non per se ipsas, sed per alias propositiones cognoscuntur.
- X. Ut habeatur certitudo mediata, ratiocinio opus est: Ratiocinium autem ad tertiam referri potest cogitationum speciem. Id si fiat juxta Aristotelis formam, quam dicunt Syllogisticam; quoties praemissae sint certae, certa item

tem erit conclusio, atque ita certa, ut certae sunt praemissae.

- XI. Hinc si praemissae sunt metaphysicè certae, vel physicè, vel moraliter, conclusio item erit certa metaphysicè, vel physicè, vel moraliter.
- XII. Hujusmodi praemissae appellari commodè possunt scientiarum principia, quatenus his uti solemus, ad veritatem in re quâlibet detegendam: dicuntur etiam veritatis criteria; sunt enim veluti norma quaedam, seu mensura ad conclusionis veritatem aestimandam, ac quodammodo dimetiendam.
- XIII. Principia Conclusionis metaphysicè certae sunt vel propositiones per se notae, quae dicuntur Axiomata, vel propositiones revelatae, quibus Theologi potissimum niti solent.
- XIV. Principia conclusionis physicè certae sunt, quae sensuum ministerio adipiscimur, & sunt veluti sensuum ipsorum attestationses, seu renunciationses: Hujusmodi attestationses, licet summam evidentiam, quae cognitionis intuitivae propria est, non attingant, sunt tamen interdum certae, nec de iis dubitare ullatenus potest Intellectus docilis, & minimè perversus.
- XV. Quod sensus nostri in primis nobis renunciant, est Corporum existentia. Itaque primo contra Malebranchium, Berkeleyum, recentissimosque Idealistas propugnamus, ita nobis constare de hujus renunciationis veritate, ut nonnisi per summam dementiam, & mentis perversitatem assensum negare possimus huic cognitioni per sensus habitae = Corpora existunt =
- XVI. Renunciant secundo sensus nostri alia plura circa haec ipsa Corpora, magnitudines nempe, motus, situs, & figurae. Quoad hanc renunciationem, licet ultrò fateamur, quandoque decipi nos facile posse, tamen si eâdem, uti par est, utamur, veritatem certò assequi in plerisque licet.
- XVII. Praecipuis hinc recensitis errorum causis, in quos sensuum occasione incidimus, legibusque ad eos evitandos a

doctis Philosophis statutis, asserimus, eâdem certitudine, quâ corporum existentiam, nos posse alia plura circa Corporum affectiones, sensibus benè utendo, certò scire, atque cognoscere.

XVIII. Principia Conclusionis moraliter certae sunt, quae potissimum in hominum auctoritate versantur, quae quo major est, majorem etiam certitudinem parit: ac proinde omnium validissima certitudo moralis illa est, quae fundatur in omnium hominum testimonio, juxta illud vulgare proloquium ab Aristotele primo prolatum: *Quod omnibus videtur, verum est.*

XIX. Cum autem certitudo moralis plures gradus suscipiat, hinc, licet consensus desit universalis, qui sanè in pluribus haberi non potest, poterit quandoque paucorum etiam testimonio haberi certa cognitio.

XX. Ne vero in his decipiamur, praesertim ubi e veterum scriptis elicienda veritas est, magnâ sagacitate, diligentiaque utendum: Ad haec maximè prodesse possunt eae regulae Critices, quae passim circumferuntur a Recentioribus; Eas tamen, ut disputationibus minus accomodatas, hic praetermittimus.

XXI. Haec quoad veritatis Criteria, seu Conclusionis certae principia: quae tamen si desint, ut in pluribus sanè contingit, non omnis tamen deponenda est cura, seu studium inquirendae veritatis: adsunt enim quandoque rationes graves, ac solidae, licet incertae, quae ad altum scientificum sternunt viam, ac saepè etiam perdunt.

XXII. Dum adsunt rationes graves, ac solidae, haberi potest opinio, quae commodè definiri potest: *Affensus inevidens, & incertus, quo aliquid cognoscimus cum formidine de opposito* (saltem radicali, ut ajunt) *dependenter a principijs incertis, & inevidentibus.*

XXIII. Opinionis proprietas maximè attendenda in Scholis, est probabilitas: probabilitas verò opinionis est meritum, quo prudenter admittitur, uti vera, propositio opinabilis.

XXIV. Quod

- XXIV. Quod meritum tum dari adfirmamus, cum revera propositio deducitur ex principiis gravibus, & solidis, licet fallibilibus; ac proinde ea tantum propositio dicetur probabilis, quae sit illata ab hujusmodi principiis.
- XXV. Cum autem vis rationum licet gravium, & solidarum ab oppositis rationibus elidi possit, non dabitur propositio probabilis, licet deducta ex gravioribus, ac solidis rationibus, cum nimirum vis rationum pro unâ sententiâ elidatur a vi rationum pro contrariâ sententiâ.
- XXVI. Hinc non censemus probabilem propositionem deductam ex rationibus gravibus, ac solidis, si rationes contrariae sint aequalis soliditatis, & gravitatis. Tunc enim prudentiae est dubitare pro utrâque parte, & pro neutrà opinari.
- XXVII. Nec censemus probabilem eam etiam propositionem ex rationibus gravibus, ac solidis deductam, cujus rationes contrariae sint paulo minoris soliditatis, de quâ suspicari tantum licebit, non opinari.
- XXVIII. Haec autem probabilitas, quae speculativa dicitur, ac directa, diversa est a probabilitate reflexâ, & ad mores pertinet, quaeque quandoque fundari potest in ipsâ incertitudine de existentia praecepti, quam incertitudinem faciant rationes hinc inde contranitentes ab Auctoribus gravibus diligenter examinatae: hinc cavendum, ne probabilitas una cum alterâ confundatur probabilitate.
- XXIX. Ad veritatis acquisitionem Methodi ratio habenda est in primis: ipsius enim ope ea habetur Idearum, judiciorum, ac cujuslibet ratiocinii dispositio, quae non obscuram, aut implexam, sed omnino claram, ac certam veritatem progignit.
- XXX. Quod ergo ad Methodum pertinet, nos affirmamus, Analyticam, quam dicunt, esse omnibus anteferendam: Cum enim humani intellectus imbecillitas ferat, ut non nisi per gradus ad apicem cujusvis facultatis devenire possimus; tunc tantum id nos esse assecuturos sperabimus, cum per Analysim, hoc est per resolutionem, & per partes singula veritatis objecta examinaverimus.

XXXI. Haec autem Methodus, si in caeteris, in Physicis praecipuè maximum usum habet, ac commodum; cum experimentorum ope, & observationum paulatim rerum materialium natura detegitur; ac tandem vires illae determinantur, quibus singula Mundi hujus Phaenomena conficiuntur.

XXXII. Ut vero res per Analysim detecta magis, ac magis detegatur, ac pateat, maximè prodesse solet Methodus Synthetica: Hinc Newtonianis assentientes utramque complectimur, ita tamen, ut semper Analytica praecedat, subsequatur Synthetica.

XXXIII. Damnamus proinde Cartesianos Syntheticam Methodum adhibentes, nullà prius per Analysim veritatis exploratione praemissâ. Perperam enim cos philosophari affirmamus, qui hypotheses ita admittunt, ut causam aliquam absolutè existere affirmant, praecisè quia, eâ positâ, mechanicâ aliquâ ratione possint Phaenomena explicari.

XXXIV. Ad Methodum etiam referri possunt eae philosophandi regulae, quae passim adhibentur a viris doctis, & quarum usu ad veritatis conquisitionem non raro devenerunt: Eas nos amplectendas esse in Physicis judicamus, quas & Newtoniani amplectuntur, & acceptas referunt a sapientissimo eorum Principe Newtono. Sunt autem haec regulae. 1. Causae rerum naturalium non plures sunt admittendae, quam quae verae sunt, earumque Phaenomenis explicandis sufficiunt. 2. Effectuum naturalium ejusdem generis eadem sunt, quatenus fieri potest, causae assignandae. 3. Qualitates corporum, quae intendi, & remitti nequeunt, & quae omnibus, in quibus experimenta instituere licet, corporibus competunt, pro Corporum universorum qualitatibus haberi possunt.

XXXV. Has regulas & bonas esse, & ad verum nos ducere, tum experientiâ rerum omnium Magistrâ, tum & ratione ipsâ efficacissimè comprobatur. Prima enim illi principio nititur, quod communiter omnes admisserunt Philosophi: *nihil fit sine causa*. Secunda verò, ac tertia in-

in-




inductione fundantur, quod argumenti genus in Physicis ideo maximi est semper habitum, quod Naturam tendere ad uniformitatem passim videmus.

XXXVI. Suam & Leibnitius regulam philosophandi tradidit, principium nempe rationis sufficientis in eo situm, ut debeat semper haberi ratio sufficiens, cur aliquid potius sit, quam non sit. Quoad hoc duo hic affirmamus, 1. Si principium rationis sufficientis extendatur ad exercitium etiam libertatis, requitendo aliquid praeter ipsum arbitrium, ipsamque liberam determinationem ad quemlibet voluntatis actum, ut fit a Leibnitio, ac Leibnitianis, esse omnino rejiciendum, utpote quod libertatem arbitrii tam humanam, quam Divinam penitus evertit. 2. Si vero ad ipsum libertatis exercitium non extendatur, non esse cur de eo principio tantopere se se jactent Leibnitiani, vel enim nullius erit usus, vel ab eo non differet, quod superius commemoravimus: *Nihil fit sine causa.*

XXXVII. Nec minus Cartesius regulam philosophandi tradidit, estque celeberrima illa universalis dubitatio, quam reprobamus omnino. Seria enim, & universalis de omnibus dubitatio est veritatis adeo inimica, ut eam e medio penitus tollat. Volumus tamen moderatam dubitationem: Atque haec est optima veritatis detegendae regula sapientissimorum hominum usu probata, maximèque necessaria, ut nihil unquam tanquam certum admittamus, nisi tale nobis post accuratum examen appareat.

## E X P H Y S I C A.

XXXVIII.  Motuum legibus exordiendum putavimus Physicarum rerum tractationem, quod ex iis potissimum derivantur recentiorum Physicorum praeclarissima inventa. Hinc primo affirmamus cum omnibus Newtonianis dari in materiâ vim inertiae, quâ corpora perseverant in eo statu quietis,

vel motus uniformis indirectum, in quo semel sunt posita.

XXXIX. Hanc autem inertiae vim contra Eulerum affirmamus a priori demonstrari nullo modo posse: quin immo determinationem, quam Corpus habet ad quietem, vel motum uniformem indirectum, in quo semel est positum, censemus esse non absolutam, sed respectivam, respectu nimirum ejus spatii, in quo continemur nos, & omnia, quae nostris observari sensibus possunt, corpora; uti fas est ad conciliandam Newtoni gravitatem cum Telluris quiete, quam cum moveri dicemus, de motu tantum relativo intelligendum erit, non absoluto.

XL. Haec autem vis est conditionata, & passiva: quare in suo statu quietis, vel motus corpus ob vim inertiae non perseverat, nisi cum nulla adsit activa vis, quae illud cogat mutare statum: Cum autem adest activa vis vel minima, a suo statu quietis, vel motus uniformis in directum perturbatur; unde illud consequi necesse est, ut ad saltum Pulicis, ut ajunt, moveatur totus orbis.

XLI. Dum Corpus a suo statu perturbatur, producitur semper nova velocitas, quae semper est proportionalis vi agenti, tempori, quo illa agit, & quantitati materiae, quâ illud constat. Atque hinc profluit Corporum resistentia quantitati materiae proportionalis, quâ Corpus videtur resistere vi impressae licet revera illi semper obediat.

XLII. Potentiae autem, quae agunt in Corpora, semper agunt ita, ut binas aequales, & oppositas motuum summas producant in binis corporibus, ac proinde vires quaecumque producant semper celeritates massis reciproce proportionales: Atque haec est celeberrima illa lex actionis, & reactionis aequalium, quam perperam nonnulli confundunt cum Corporum resistentiâ.

XLIII. Vis inertiae, utpote passiva vis, & conditionalis componi optimè potest cum aliis quibuscumque activis viribus. Hinc Corpus licet vi inertiae praeditum, habere etiam potest activas vires, quibus se ipsum per sese ad

mo-

motum determinet, purificatis, ut ajunt, conditionibus.  
 XLIV. Et sanè nos affirmamus, omnes ac singulos materiae motus, quos in naturâ conspiciamus, quibus productiones omnes, omnesque destructiones conficiuntur, caeteraque omnia materialia Phaenomena, ab ipsâ materiâ in se ipsam produci. Juxta quam sententiam repulsiones omnes ac attractiones, quas in materiâ agnoscunt Recentiores, nihil aliud erunt, nisi determinaciones materiae ad eos sui ipsius motus, quos hic, & nunc ipsa per se ipsam producit juxta diversas corporum caeterorum circumstantias, quae rationem habeant conditionis, quam Scholastici dicunt, sine quâ non.

XLV. Ex hac sententiâ duas deducimus conclusiones in Metaphysicâ pertractandas, ubi de causis efficientibus, alteram contra Cartesianos, contra Peripateticos alteram; Contra Cartesianos affirmamus, adesse revera in naturâ causas efficientes motus locales, rejiciendas proinde causas merè occasionales.

XLVI. Contra Peripateticos vero affirmamus, hujusmodi Causas efficientes non esse ullo modo influentes. Negamus enim verum influxum, seu, ut ajunt, virtutis emanationem; ac dicimus, affectiones omnes cujusvis Corporis ex ipso corpore sic affecto derivare, atque effici tantummodo ob vim sibi intrinsicam, quam habet materia ipsa: adeout sicuti Anima suas affectiones spirituales per se ipsam producit, sic materia per se ipsam pariter affectiones suas materiales efficiat.

XLVII. Hinc ea erit Corporum vis singulis materiae particulis competens, quâ si seorsum quodlibet in naturâ existat, perseveret in eo statu quietis, vel motus uniformis in directum, in quo sit positum; si alia alibi existant corpora, componat praecedentem motum cum motu, quem determinant aliorum corporum diversae circumstantiae.

XLVIII. Haec autem motuum compositio hoc pacto habetur. Si corpus in eadem directione movebatur, in quâ nova agit determinatio ad motum, nova celeritas adjun-

gitur celeritati priori. Si movebatur directione contrariâ adjungitur negativè, sive detrahitur: & si forte aequalis sit nova producta celeritas priori celeritati, motus sistitur; si major motus ad oppositam plagam detorquetur.

XLIX. Si potentia perpetua agat in Corpus eadem directione, perpetuo acceleratur, aut retardatur motus, idque vel difformiter, vel uniformiter, prout novae celeritates sive conspirantes, sive oppositae; quae aequalibus temporis intervallis accedunt, aequales sunt inter se, vel inaequales: quae si aequales sint, fiatque motus perpetuo uniformiter acceleratus, vel retardatus, spatia aequalibus temporibus a corpore descripta, erunt veluti numeri impares crescentes, vel decrecentes pro ratione celeritatis crescentis, vel decrecentis.

L. Si nova celeritas generatur in aliâ directione diversâ ab eâ, in quâ corpus movebatur, corpus deflectit a priore per diagonalem parallelogrammi, cujus bina latera expriment, alterum celeritatem, ac directionem, quam habebat prius, alterum novam: itaut ad finem ejus tempusculi, quo alterutrum percurrisset latus, percurrerit diagonalem.

LI. Et si ea nova celeritas perpetuâ actione potentiae perpetuo generatur, perpetuo etiam corpus a suo deflectit itinere, & lineam describit curvam cavam versus punctum illud, in quod urgetur; ubi illud demonstratur, areas descriptas a supradictis curvis esse semper temporibus proportionales, scilicet spatia illa plana clausa arcu diversis temporibus descripto, & rectis, quae ab ejusdem arcus extremis ducuntur ad centrum illud, esse inter se, ut tempora.

LII. Dum autem Corpus describit curvam, ob vim inertiae conatur semper abire per lineam rectam, quae tangit arcum curvum, & ab eodem arcu recedere; qui conatus utpote a vi passivâ derivatus perpetuo eliditur a vi illâ activâ urgente corpus ipsum versus datum centrum. Hinc triplex distinguenda vis erit in qualibet descriptâ curvâ, vis nempe tangentialis, centrifuga, & centripeta; illae dicendae erunt vires passivae, haec activa. LIII.

LIII. Quod ad lineas curvas spectat supradicto modo descriptas, eas tantum indicabimus, quae ad Astronomiam, praerequiruntur, cujusmodi illae sunt, quae describuntur, dum Corpus quodcumque projectum versus quamcumque plagam, alio sollicitatur in datum centrum viribus decrefcentibus in ratione reciproca duplicata distantiarum, sive eo minoribus, quo distantiarum quadrata majora sunt. Porro curvae lineae a corpore ita projecto, ac hujusmodi viribus in datum centrum actis, descriptae sunt semper conicae sectiones, nimirum Ellipses, Parabolae, vel Hyperbolae, prout velocitas projectionis fuerit minor, aequalis, vel major respectu datae cujusdam velocitatis: quae si parum abludat ab illa celeritate, quae requireretur, si Corpus caderet motu uniformiter accelerato per dimidiam distantiam a centro virium, corpus cum ea projectum per rectam continentem angulum parum abludentem a recto cum recta linea ducta a corpore ad Centrum erit Ellipsis, existente gravitatis centro in alterutro ipsius foco, eaque parum abludet a Circulo; In reliquis autem casibus erit magis, vel minus producta, prout magis, vel minus ab ea velocitate differet velocitas projectionis, & ab angulo recto is angulus deflectet.

LIV. Ex datâ lege illud etiam consequitur, ut in Systemate plurium corporum circa commune gravitatis centrum per Ellipses gyrantium nec majori, nec minori velocitate projicienda haec sint, quam quâ orbitam ita percurrant, ut quadrata temporum Periodicorum sint proportionalia cubis distantiarum mediarum ab ipso foco, sive, quod idem est, Semiaxium transversorum.

LV. Si hoc Systema projiciatur secundum quamcumque directionem ita, ut secundum eam directionem acquirant singulae ejus Systematis partes velocitates aequales, progredietur motu uniformi in directum centrum commune gravitatis, & cuncta illa corpora progredientur motu illo eodem, Elliptico circa illud commune gravitatis centrum: quod si totum hoc Systema attrahatur in aliud da-

datum punctum in ratione reciproca duplicata distantiarum, poterit hoc ipsum Systema, sive ipsius centrum circa hoc punctum Ellipsim describere.

**LVI.** Si vis, qua supradicta Corpora in centrum tendunt, in ratione reciproca duplicata distantiarum sit, uti ex supradictis esse debet, ob vim mutuam singularum materiae particularum agentium, ac reagentium actionibus aequalibus, innumerae contingent perturbationes, quae eo erunt magis exiguae, quo ea corpora minora sint respectu corporis prope commune gravitatis centrum existentis, & quo sint inter se remotiora, atque ita hinc inde a communi centro dispersa, ut errores orti ab actione unius magna ex parte elidi debeant ab aliorum actionibus; Quae tamen perturbationes adhuc corrigentur magis, posteaquam toties singula ea corpora revolutiones suas peregerint, ut jam omnes, quas habere possunt, oppositas positiones habuerint ad se invicem.

**LVII.** Haecenus hypoteticè de viribus iis, quae in materiâ vi inertiae praeditâ haberi potuissent: nunc de realibus, & existentibus, ac primo de vi gravitatis, qua Corpora sublunaria in Terrae centrum tendunt, quam affirmamus in aequalibus a Telluris centro distantibus aequalem esse in omnibus, ac quibuscumque aequalibus materiae particulis; hinc quaecumque corpora, remoto quolibet medio resistente, liberè sibi commissa aequali descendunt velocitate in superficiem Terrae.

**LVIII.** Eam autem gravitatis inaequalitatem, quae pendulorum esse deprehenditur recedendo a Polis, provenire affirmamus magnâ ex parte a vi centrifugâ, quam Corpora acquirunt, quo magis ad aequatorem accedimus ob diurnum Telluris motum circa proprium axem: ex quo pariter factum fuit, ut Terrae figura debuerit esse compressa ad Polos, & prominens sub Equatore: ne nimirum Oceani Aquae sub Equatore redundarent.

**LIX.** A peculiari Corporum sublunarium gravitate ad universalem jam gradum facimus. Jam vero gravitatem, quam adesse diximus in Corporibus sublunaribus aequalem

in

in omnibus aequalibus materiae particulis, nunc cum Newtono admittimus universalem; adeout singulas materiae particulas in singulas materiae particulas, quotquot sunt in Mundo, gravitare affirmemus, atque ita, ut in aequalibus distantiiis sit aequalis in aequalibus materiae particulis; in inaequalibus vero distantiiis decrescens in ratione reciproca duplicata distantiarum.

LX. Ope hujus gravitatis universalis una cum iis. motuum legibus superius expositis, innumera explicantur Phaenomena tum caelestia, tum terrestria: in primis tamen explicantur singuli motus totius Systematis Planetarii: ac primò, juxta primam Kepleri legem, cur Planetarum Orbitae sint Ellipticae, Sole existente in altero eorum foco: secundò, juxta secundam Kepleri legem, cur Aerae, quas percurrit, & quodammodo vertit recta linea ducta a Sole ad Planetas sint temporibus proportionales: tertio, juxta tertiam Kepleri legem, cur si conferantur bini Planetae quicumque, sint quadrata temporum periodorum ut Cubi distantiarum mediarum a Sole.

LXI. Nec modo Planetarum primariorum motus explicantur cum tribus Keplerianis legibus, verum etiam secundariorum, componendo scilicet eorum motus circa Solem cum motu circa primarios.

LXII. Item & Cometarum motus explicantur: ubi tamen illud supponimus, quin immo invictissime propugnamus contra Vetustiores Philosophos, ac nonnullos etiam Recentiores, Cometas non esse vaporum, vel exhalationum congeriem, sed astra quaedam perennia, seu, ut ajunt, Corpora Mundo Coaeva, quae eandem in specie orbitam describant, nempe Ellipticam, quam describunt Planetae. Atque illud etiam propugnamus, Cometam, a nobis visum sub finem anni 1759. eundem fuisse, qui anno 1606. & 1682. apparuerat, quemque Newtonus praedixerat rediturum post annos circiter 76.

LXIII. Nec minus ex supradicta gravitatis theoriâ deducuntur omnia cometicae atmosphaerae Phaenomena. Explicatur enim, cur atmosphaera haec sese modo in morem cernis

nis conformer, modo barbae, & modo etiam caudae, & cur hacc ipsa cauda sit semper Soli averſa, & inclinata ad partes a Cometâ reliſtas, cavitare has eas eadem Caeli partes ſpectante.

**LXIV.** Explicatur deinde ope ejusdem gravitatis celeberrimum illud Phaenomenon Marini Aëſtus, cujus cauſam diutinis laboribus fruſtra, ac diu ante Newtonum conquiſierant vetuſtiores omnes, ac recentiores Philoſophi. Affirmamus proinde, fluxum, atque refluxum aquae marinae effici omnino ab ejusdem aquae gravitate in Lunam tendente, ac in Solem.

**LXV.** Explicatur praeterea juxta eandem Theoriam Aurora Borealis, deſumendo Aurorae ipſius materiam cum celeberrimo Mairanio ab atmofpherâ ſolari jam innatante ſupra noſtram hanc atmofphaeram, & ab ejusdem vi centrifugâ ad Polos projectâ.

**LXVI.** Omittimus plura alia Phaenomena, cujuſmodi ſunt irregularitates illae omnes, quae deprehenduntur in Planetarum primariorum, & ſecundariorum motibus, ac Lunae potiſſimum, quae omnia pariter affirmamus ab univerſali gravitate dependere: ſicut etiam praecellionem illam annuam aequinoſtiorum, ex qua oritur apparens ille lentiffimus fixarum motus in Orientem ſecundum directionem Eclipticae.

**LXVII.** Expoſitâ univerſali gravitate una cum iis Phaenomenis, quae inde deducuntur, exponendae jam ſunt caeterae materiae vires, ex quibus caetera materiae Phaenomena deindè derivabimus. Has inter principem locum tenet repulſiva illa vis in minimis agens diſtantiis, quam cum Boſcovichio dicimus eo majorem eſſe in infinitum; quò diſtancia ipſa minuitur in infinitum.

**LXVIII.** Hujus exiſtentiam certo deduci ex centinuitatis lege adverſarii ipſi jam ultro fatentur; negant tamen centinuitatis legem: contra hos affirmamus, hujusmodi centinuitatis legem omnino aſſe in Naturâ, eamque potiſſimum ſervari in velocitatum productione inviſtiſſimis argumentis comprobamus, ac planè oſtendimus.

**LXIX.**



LXIX. Admissâ hujusmodi vi repulsivâ, illud sequi necessesse est, nullam materiae partem esse alteri contiguam: erunt proinde prima materiae elementa omnino simplicia, & a nullis contiguis partibus composita, atque inextensa, uno verbo erunt puncta indivisibilia.

LXX. Praeter vim repulsivam in minimis distantis, & in majoribus distantis attractivam, multo plures agnoscimus in materiâ vires, quae inter duas illas mediant; Cujusmodi illae sunt, quae se produnt in fermentationibus, & effervescentiis adeo diversis, in quibus cum adeo diversis velocitatibus eunt, ac redeunt, & jam ad se invicem accedunt, jam recedunt a se invicem particulae.

LXXI. Et licet nec numerus constet, nec quantitas harum multiplicum virium, illud tamen affirmari potest, nec eas crescere, nec eas decrescere, nisi per intermedios gradus, juxta legem continuitatis. Hinc eadem optimè exponi poterunt per celeberrimam curvam Boscovichianam exprimentem continuum illum transitum ex repulsivis in attractivas, & ex attractivis in repulsivas per plures vires auctis distantis, donec ex una parte in attractivam Newtonianam deveniatur, ex alterâ in repulsivam Boscovichianam.

LXXII. Vires hactenus expositas convenire volumus singulis quibusvis materiae particulis, seu punctis: Hinc materiae elementa erunt inter se prorsus similia, & homogenea; quod praeter caetera ipsa etiam Naturae analysis insinuat: ac proinde hic, ut etiam in aliis pluribus a Leibnitianis dissentimus, rejectis omnino iis omnibus principiis vel ut falsis, vel ut malè applicatis, unde elementorum homogeneitatem iidem evertere conati sunt.

LXXIII. Statutâ materiae simplicitate, & homogeneitate, illud sequi necesse est, corpus physicè consideratum nihil aliud esse, nisi aggregatum punctorum mutuis viribus sine ullo reali contactu inter se nexorum: Corporum vero tot diversas proprietates nonnisi a diversa horum punctorum sui per omnia similium dispositione, ac compositione pendere:

LXXIV.

**LXXIV.** Atque uti ad has corporum proprietates tandem deveniamus, ab impenetrabilitate, quae inter generales primo se se objicit; exordiamur; quâ sanè ex illâ repulsivâ vi, quae imminutis in infinitum distantis augeatur in infinitum spontè fluit. Repulsiva enim illa vis tanta est, ut evadere debeat infinita, ante quam unum materiae punctum ad alterum accedat.

**LXXV.** Extensio plerumque a Philosophis concipitur cum verâ continuitate conjuncta. Nos autem cum tantum extensionem admittimus in quolibet corpore, quae non mathematicè, sed physicè tantum continua sit; & est hujusmodi, ut puncta materiae alia sint extra alia in longum, latum, & profundum dispersa, ac distantias habeant aliquas inter se, licet ita proxima, ut eorum intervalla omnem sensum effugiant.

**LXXVI.** Ex extensione oritur figurabilitas. Porro si mente concipiamus superficiem quandam ambientem spatium illud; per quod in longum, latum, & profundum nostra indivisibilia puncta sibi mutuo cohaerentia dispersa sunt; ideam habebimus figurae; quae non erit realis, sed omnino imaginaria. Puncta enim illa inextensa superficiem nullam efficiunt, quâ includantur.

**LXXVII.** Cum jam concepimus ad figurae determinationem superficiem quandam ambientem spatium, per quod in longum, latum, & profundum nostra indivisibilia puncta dispersa sunt; habemus & spatium cû superficie conclusum; & particulas per spatium dispersas. Si seorsum consideretur spatium illud; habetur moles; si numerus particularum habetur massa; si vero simul relativè considerentur & spatium, & particularum numerus, habetur densitas. Hinc densitas eo major est, quo pari mole est major massa, vel quo pari massâ est minor moles; adeo ut mensura densitatis sit massa divisa per molem.

**LXXVIII.** Nos materiae divisibilitatem in infinitum nec admittimus, nec possumus admittere: illi tamen substitui-  
mus componibilitatem, per quam in qualibet datâ corporis mole augeri semper potest ipsius densitas, seu pun-  
cto-

ctorum numerus: quae quidem componibilitas ad ea omnia, ad quae adhiberi solet in Physicis materiae divisibilitas in infinitum abundè sufficit, & eundem prorsus effectum praestat; nec iis subest difficultatibus, nunquam satis solutis, quibus divisibilitas in infinitum hætenus opugnata fuit.

**LXXIX.** Quod ad cohaesionem pertinet, ea fortasse aliis corporum proprietatibus praeponenda erat, quandoquidem per ipsam materiae elementa, de quibus jamdiu egeramus, in corpus sensibile exurgunt: quod nostrae facultatis est primum objectum. Nihilo tamen minus cum ex eâ pronum sit ad corporum differentias gradum facere, de quibus mox erit agendum, eam inter generales corporum proprietates postremum locum habere voluimus. Jam vero ad habendam cohaesionem in nostro Systemate satis est, ut materiae particulae, seu puncta in iis inter se distantis reponantur, in quibus nec vires agunt attractivae, nec repulsivae; ita tamen, ut nec removeri queant, quin in attractivas, nec admoveri, quin in repulsivas vires incurrant. Hujusmodi autem puncta haberi dicimus in iis limitibus, quos adhaesionum vocamus, in quibus a distantis repulsionum fit transitus ad distantias attractionum.

**LXXX.** Hætenus de generalibus; nunc de particularibus proprietatibus. Et primo quidem generatim perpendendum est ingens illud plurium generum discrimen, quod haberi potest inter diversas punctorum congeries, quae constituent diversa genera particularum, seu massularum.

**LXXXI.** Potest primo haberi diversa earum particularum moles sub eadem massâ; secundo diversa massa sub eadem mole; tertio sub eadem & massâ, & mole diversa figura; quarto sub eadem figurâ, densitate, & mole haberi potest diversa punctorum distributio. Ex quibus tam diversis particulis certum est haberi posse particulas, seu massulas ordinis superioris magis inter se diversas, & ex his alias, atque alias, aucto semper earum discrimine, donec deveniatur ad haec magna Corpora adeo inter se

diffimilia, quibus conficitur Mundus hic spectabilis tam multipliciter varius.

**LXXXII.** Atque ut a solidis, ac fluidis initium faciamus : Solida haberi dicimus per nexum virium attractivarum, ac repulsivarum, quibus ita contineantur in adhaesionum limitibus eorum particulae, ut quemcumque aliquot particularum motum sequantur reliquae, promotae, si illae, promoveantur, retractae, si illae retrahantur, conversae in latus, si linea, in quâ ipsae jacent, directionem mutet. Fluida vero haberi dicimus, cum desit hujusmodi nexus inter eorum particulas, & cum aedem particulae superficiei constant omnino sphericâ, ac laevigatâ, ut sic impressioni cuicumque cedant, & cedendo faciliè moveantur inter se.

**LXXXIII.** Nos in fluidorum particulis, seu massulis requirimus etiam elasticitatem, & quidem hujusmodi, ut ex quacumque parte aedem comprimantur, aequè & ipsae reagant per omnes sui partes, ut contingit in foliis luforiis satis inflatis; Ac affirmamus sine hujusmodi elasticitate, quae haberi sanè potest, & quidem perfecta, sine ullâ sensibili compressibilitate, explicari nullo modo posse fluidorum pressionem per omnem partem aequalem; unde enascuntur hydrostaticae, & hydraulicae leges.

**LXXXIV.** Quoad elastica, quomodo eadem haberi possint, ex nostrâ theoriâ per se fluit. Sunt enim particulae omnes in quolibet mixto ita constitutae in adhaesionum limitibus, ut utralibet ex parte comprimantur, vel distrahantur, incurrant statim in vires repulsivas, vel attractivas, quibus ad eosdem adhaesionum limites iterum redire propellantur. Atque illud in his contingere necesse est, ut ubi redierint, excurrant ulterius hinc inde per plures vices: unde oritur tremor, & oscillatio in elastris satis conspicua.

**LXXXV.** Si vero adhaesionum limites sint hujusmodi, ut quoties particulae comprimantur, vel distrahantur, faciliè eae possint in alios quamplurimos adhaesionum limites incurrere, tunc peractâ quâvis compressione, vel distra-

ctio-

atione, non conabuntur locum pristinum recuperare; sed in novo acquisito limite omnino quiescent, & corpus ita compactum dicetur, vel molle, vel ductile; prout majori, vel minori vi cogi poterit ad figuram immutandam.

LXXXVI. Atque hinc primum est delabi ad aërem, in quo fluiditatem, & elasticitatem satis perfectam deprehendimus. Itaque quoad aërem primo affirmamus, cum non modo gravem esse, ut exigit ratio universalis gravitatis, verum etiam ita agere gravitate suâ in superficiem terrae, ut totum ab eâ imminenti aëris pondus sustineatur, ut satis ostendunt elevationis Mercurii in Tubis Torricellianis, ac plurima alia Phaenomena quondam attributa horrore vacui:

LXXXVII. Affirmamus secundo ex ipsius motu tremulo, & vibratorio oriri in auditu organo motionem ad perceptionem soni requisitam: hinc in aëre jure reponemus sonum derivativum, atque etiam existimamus optimè explicari posse cum Mairanio, quomodo ex diversis aëris particulis diversimodè tensis diversae haberi possint vibrationes, celeriores nempe vel tardiores, unde oriatur diversa toni perceptio secundum grave, & acutum.

LXXXVIII. Hujusmodi autem motus tremulus, ac reciprocus aëris passim cietur a sonoris corporibus permotum tremulum, ac vibratorium minimarum particularum, quibus eadem conficiuntur: atque hoc pacto haberi affirmamus sonum primitivum aeris Campani, atque etiam chordarum, & non per oscillationem, quae potius erit causa, cur tremant, ac vibrentur minimae earum particulae.

LXXXIX. Ex aëre, qui auditus organum percellit, statim ad reliqua progredimur corpora, quae sensus caeteros afficiunt. Ignis referri potest ad Organum tactus: Ejus naturam in vehementi fermentatione reponimus, quam acquirat vel potissimum, vel etiam solâ sulphureâ substantiâ, cum quâ fermentat materia lucis vehementissimè.

XC. Hujusmodi autem fermentationem haberi dicimus, cum mutatis parum admodum distantis sulphurearum particularum per exiguum unius scintillae, vel tenuissimorum ra-

diorum accessum, jam aliae vires succedunt, & per earum reciprocationem perturbatus particularum motus per totam etiam massam propagatur.

**XCI.** Atque hinc caloris affectio. Calor enim sic acceptus nil est aliud, nisi illa Animae perceptio, quae tunc habetur, cum eadem sulphurea substantia in organico corpore tenuiori fermentat motu: quod si vehementiori fermentet motu usque ad partium scissiones, & alterationes, habetur combustionis perceptio. Si penitus quiescat sentitur frigus, quod est caloris contrarium,

**XCII.** Ex dictis constat, quid sit lumen in nostrâ sententiâ. Erit itaque lumen quoddam particularum genus, quod fermentans cum sulphureâ substantiâ frequenter incurrat in vires eas repulsivas, quibus vehementissimè excutitur, ac velocissimè jaculetur,

**XCIII.** Hinc, rejectis aliis hypothesebus Cartesianis fluidi prementis, siue Hugenianis, ac Eulerianis undarum Aetheris subtilissimi, affirmamus cum Newtono, lumen consistere in effluviis particularum jugiter ab igne, siue a lucido corpore emanantium.

**XCIV.** Quoniam lumen in effluvio consistit, ejus propagatio esse nequit instantanea: erit ergo successiva. Id ipsum deprehenditur ex observatis circumjovialium eclipisibus, & ex annuâ fixarum aberratione. Ex quibus etiam Roëmerus comperit, lumen a Sole ad Terram non prius devenire, quàm horae circiter semiquadrante.

**XCV.** Fier item luminis propagatio, (si medium, per quod radius incedit, diaphanum sit, nec ullibi sensibiliter immutatum) per lineas sensibiliter rectas, ac divergentes ita, ut lucidos conos efficiat, quorum vertices in ipso lucido corpore sint constituti.

**XCVI.** Quoties medium mutat radius, vel reflectitur, vel (si quidem obliquè incidat) refringitur. Reflexionis autem, ac refractionis causas non ab impactu in solidas novi medii partes, uti Cartesius putabat, sed a mutuâ inter lumen, ac corpora reflectentia, seu refringentia actione, quae in diversis circumstantiis diversimodè exer-

ri-

ritur, repetendas cum Newtonianis censemus; quod est nostro *Systhemati* punctorum satis uniforme.

**XCVII.** In quavis reflexione, ac refractione aliqua luminis pars quaquaversum sine lege dispergitur; magna autem pars ita reflectitur, ut angulus incidentiae aequalis sit angulo reflexionis; ita refrangitur, ut sub quovis angulo refractione fiat, sinus incidentiae ad sinum anguli refracti constantem habeat rationem.

**XCVIII.** Refractio autem modo fit accedendo ad perpendicularum medii, in quod de novo radius immergitur, modo ab eodem recedendo. Fit accedendo, quando novum medium habet in luminis particulas majorem vim attractivam; fit recedendo, quando minorem. Vis autem haec attractiva generaliter eo major est, quo medium est densius: aliqua tamen differentia adesse potest, pro ratione materiae sulphureae, quae caeteris paribus majorem habet vim attractivam in luminis particulas.

**XCIX.** Assumpto quolibet luminis radio non eadem observatur in omnibus ejusdem particulis refractione: dividitur enim in septem radiolos, quorum singuli diversam habent refrangibilitatem; eamque ita constantem deprehendit Newtonus per plurima accuratissime, ac ingeniosissime tentata experimenta, ut sine omni dubitatione affirmare possimus, eam pendere a diversâ particularum constitutione ipsismet particulis intrinsecâ, non vero a novis modificationibus, quas inter refrigerandum, vel reflectendum radii habeant, ut plurimi existimarunt.

**C.** Pro ratione diversae refrangibilitatis diversam habent actionem luminis particulae in Organum visus. Hinc juxta Newtonianam theoricam affirmamus, colores consistere in diversâ particularum constitutione ipsismet particulis intrinsecâ; adeoque singulos luminis radios constare septem diversae speciei radiolis diversimodè afficientibus Organum visus.

**CI.** Juxta hanc Theoriam corpora non aliâ ratione diversimodè colorata apparent, nisi quod diversam habent texturem; quo fit ut una superficies magis apta sit unum.

colorem reflectere; alia alium, & reliquis absorptis, five etiam refractis. Cujus texturæ rationem cum Newtonus investigasset, invenit vires illas: facilioris reflexionis, & facilioris transmissus, ex quibus jam constitit, cur corpus quodlibet uno potius, quam alio tingatur colore.

CII. Differentias, quas inter radiolos coloratos in refringendo exhibet spectrum depictum a lumine per Prisma transmissum, elegantem habere analogiam cum differentiis longitudinis. Chordæ reddentis musicos tonos in octavâ progredientes per tertiam minorem, & sextam majorem affirmavit Newtonus; & post ipsum Newtoniani; & experimenta accuratius capta ab Accademicis præsertim Petropolitans, nullam hujusmodi analogiam offendunt.

CIII. Quo majorem habuit refractionem luminis radius, eo minori velocitate progreditur, ut facile ostendi potest per virium resolutionem; Atque hinc reddi potest ratio, cur rubeus color omnium maxime percellat oculos, violaceus omnium minimè, viridis vero, qui vi impingit mediâ, & cui potissimum debuit Naturæ Auctor oculi fibras attemperare, sit omnium jucundissimus.

CIV. Colores primigenii dum commisceantur, diversum efficiunt colorem; hinc colores, quibus corpora induuntur, diversi ab iis septem; qui ope Prismatis separati in spectro depinguntur, ex plurium radiolorum heterogeneorum permixtione derivare dicendi sunt. Quando autem omnes simul reflectuntur, habetur album, quando nullus reflectitur habetur nigrum.

CV. Quæ hætenus diximus, præbent rationem colorum, qui exhibentur per refractionem in Prismate, per reflexionem in corporibus opacis. Sed adest etiam tertia colorum ratio in Iride, nempe per refractionem simul, & reflexionem habitas in rotundis pluviae guttis.

CVI. Superest ut aliquid definiamus circa diaphaneitatem, & opacitatem. Causa cur corpora alia diaphana sint, alia opaca, non est, quod illa poris rectis, & undique perviis abundent, hæc non; sed quod illorum partes æquè densæ sint, & homogeneæ, horum vero non ita; quod



quod & Newtonus ipse detexit, & est nostrae theoriae  
punctorum accommodatissimum. A T I N A

CVII. Atque hinc etiam patet, unde ortum habeat lux illa tam multorum Phosphorum: etenim posteaquam lux intra heterogeneas corporum opacorum partes tam multis, tam variis erravit ambagibus, ob virium inaequalitatem, aliquā saltem sui parte) deveniet iterum ad superficiales particulas, & avolabit.

CVIII. Quibad diffractionem verò nihil in specie addemus, quod eam existimemus esse quamdam veluti inchoatam reflexionem, & refractionem, quam lux subit prope corporum tenuissimorum acies.


CIX. Saporis senium excitant in palato particulae salinae, nec modo ob earum formam, quam constare esse satis angulosam, & cuspidatam; verum etiam ob vires varias, quibus dum eadem dissolvuntur, aptae sunt ad diversum excitandum motum in papillis palatino.

CX. Odor est quidam ténuis vapor ex odoriferis corporibus jam fermentantibus non dissimili modo emissus, ac a lucidis corporibus lumen emittitur; multo tamen minori velocitate hic vapor emittitur, ac lumen. Et cum ad odoris sensum excitandum respiratione opus sit, quâ particulae illae odoriferae deferantur in papillas nervi olfactorij; haec est nobis ratio, eua probabiliter existimemus particulas odoriferas jam emissas ab odoro Corpore, adhuc invicem fermentare per aërem dispersas.

CXI. His proinde non assentimur; qui odoribus etiam tribuunt proprietatem luminis; ut nimirum eorum densitas minuat in ratione reciproca duplicatâ distantiarum: ea enim proprietas non convenit, nisi iis, quae a dato puncto diffunduntur in sphaeram cum uniformi velocitate.

CXII. Agnosceimus praeterea fluidum quoddam electricum, cujus Phaenomena tam multiplicia, ac varia materiam dabunt Scholasticis iis lectionibus, quas non prius absolvemus, quam cum a philosophicis studiis vacare per autumnales ferias licebit.

# EX METAPHYSICA.

**CXIII.**  Raetermissis iis, quae in Metaphysicâ pertractavimus, de Ente tum absoluto, tum relativo, ac de substantiis singulis, ejusque modis, nec non de tempore; & spatio ( quod haec magis ad instituendum intellectum apta sint, quam ut in disputando voluptatem ullam asferre possint ) ea tantum seligemus, quae de Deo, ac homine facultas haec praestantissima suppeditare nobis potest contra veterum, ac recentiorum errores; ostendendo nimirum, dari non modo summum spiritum, verum etiam spiritus inferiores.

**CXIV.** Ab Homine exordiendo: primo oppugnabimus Materialistas unicum in Homine admittentes principium. Affirmamus enim principium humanarum cogitationum, ac volitionum esse omnino immateriale. Quid enim in homine cogitare dicemus, ac velle? Num quamlibet materiae particulam, quibus humanum corpus conficitur? At non unica amplius erit in Homine cogitatio, sive voluntas. Num complexum totius materiae? ergo ex merâ modificatione, quae nihil aliud dicit, nisi diversos locales modos accedet illi virtus cogitativa, ac volitiva?

**CXV.** Adeoque perperam omnino spinosa unicam vult in Mundo adesse substantiam extensam, & percipientem: admittenda enim est substantia altera a materiâ omnino distincta ad cogitationes, & volitiones eliciendas apta, quae proinde erit indivisibilis, & inextensa, ut indivisibiles, & inextensae sunt humanae cogitationes, ac volitiones.

**CXVI.** Constat ergo Homo duabus substantiis, alterâ corporeâ, & sensibili, alterâ incorporeâ, & insensibili, quam appellamus Animam, & est ipsa humana mens. Hujusmodi autem substantiae sunt ita inter se nexae, & unitae, ut ex duabus naturâ diversis unica tantum fiat persona, atque unum per se, hoc est unus homo.

**CXVII.** It autem nexus, sive unio importat commercium: illud satis mirandum, quod corpus inter, & Animam

mu-

- tuo intercedit, quo nempe corporis operationes, ut sunt potissimum spontanei motus, ac liberi ab Animâ dependent, & quo vicissim Animæ operationes, ut sunt potissimum sensationes omnes, dependent ab ipso corpore.
- CXVIII. Et licet Metaphysicis difficillimum semper habitum sit, rationem investigare hujusmodi Commericii, nos tamen non diffidimus aliquâ saltem probabili ratione hypotheseos, quam de novo excogitavimus hac super re palam propugnare, ac tueri, rejectis aliis hypotheseos Influxistarum, Occasionalistarum, & Harmonistarum.
- CXIX. Affirmamus enim Influxistas nimis elevare materiam, dum eam in substantiam spirituales influentem docent: Occasionalistas vero tum hic, tum alibi Naturam ipsam, in quâ juxta etiam Scripturam Sacram tantopere elucet Dei invisibilia, sapientia nempe, & omnipotentia, evertere omnino, atque ansam præbere Idealismo, & Egoismo: Denique Harmonistas inhaerere hypotheseos arbitrariis, ac rationi contrariis tum naturali, tum Divinae.
- CXX. Haec ergo erit nostra hypotheseos duabus propositionibus contenta. Sit prima propositio. Motus organici corporis ab informante Animâ imperati ab ipso corpore peraguntur sine ullo influxu ipsius Animæ, sed tantum ad conditionem volitionum informantis Animæ.
- CXXI. Sit secunda propositio: Sensationes, quae in Animâ excitantur, post motus organici corporis, seu organorum sensoriorum, ab Anima producuntur sine ullo influxu ipsius Corporis, sed tantum ad conditionem eorum motuum, qui in Corpore peraguntur.
- CXXII. Hos autem corporis motus, & has Animæ perceptiones effici judicamus ob virtutem quandam tum de novo tributam & Corpore, & Animæ, cum Anima ipsa a Deo creata in organicum corpus jam praeexistens infunditur. Atque in hujusmodi virtute & corpore, & Animæ elargitâ consistere affirmamus eam unionem, quam Scholastici vocant substantialem corpus inter & Animam, & quâ Anima fit vera, ac realis forma corporis.
- CXXIII. Quoad vero virtutem Corpore tributam, non eam vo-

lu-

lumus communem omnibus materiae particulis, quibus ipsum Organicum corpus conficitur, sed iis tantum, quae primigeniae dicuntur: factâ enim primâ impressione in has particulas ratione commercii, caeteros motus effici judicamus mechanicâ tantum ratione: quod omnino insinuat mechanica Corporis constructio anathomicis satis nota.

**CXXIV.** Hujusmodi autem materiae particulae in iis cerebri partibus potissimum continebuntur, quo tot nervi, & fibrae pertingunt idcirco, ut ibi factâ primâ impressione, caeteri sequantur supradicti motus per reliquum humanum Corpus: in quarum medio, ac quodammodo in centro quodam Animae ipsius sedem constituimus.

**CXXV.** Hinc quaecumque rejicimus virtuales Animae extensionem, quam Peripatetici voluerunt per totum humanum Corpus, Gassendistae per totum cerebrum, Cartesiani per totam glandulam pinealem. Affirmamus enim, nullam adesse necessitatem, cur Animae rationali tribuatur is existendi modus, qui peculiaris videtur Naturae Divinae, quae sanè tota est in toto, & tota in qualibet spatii parte.

**CXXVI.** At agendum jam de ejusdem Animae facultatibus: ubi sane primo se se objicit intelligendi vis, cujus actus licet in Logicâ in plures Classes distinximus, hic in Metaphysicâ uno omnes idearum nomine complectemur. Igitur actus humani intellectus sunt ideae: ideae vero aliae dicuntur directae, aliae reflexae. Quid sentiri possit circa directas ideas, sive sensationes mox exposuimus: quid vero sentiri possit circa reflexas ideas, nunc inquiremus.

**CXXVII.** Nos opinamur, ideas hujusmodi reflexas originem ducere omnes, & singulas ab humano intellectu, tanquam a principio totali physicè, & immediatè earundem productivo; Judicamus enim reflexas ideas a directis essentialiter non differre, cum unicum discrimen, quod has inter, & illas intercedit, in eo consistat, quod directae immediatè excitantur post motiones organorum sensoriorum, reflexae vero post contemplationem aliarum idearum jam praesistentium.

**CXXVIII.**

CXXVIII. Rejicimus proinde omnes, ac quascunque ideas innatas Cartesianas, ac volumus humanam mentem esse potentiam activam non modo quoad applicationem, quâ se se determinat ad contemplandas ideas, quod concedunt etiam Cartesiani, verum etiam quoad intellectionem, quod illi perperam negant.

CXXIX. Intellectus cum jam primo produxit ideam quamcumque, facultatem habet illam iterum excitandi ex vi productionis primæ. Id autem fit ope Imaginationis. Hinc in Animâ agnoscenda etiam est imaginandi vis, ab intelligendi vi distincta.

CXXX. Agnoscenda item est in Animâ vis rememorativa, seu Memoria ab imaginandi, & intelligendi in distincta, quâ non modo facultatem habet ideam primo productam iterum excitandi, verum etiam ita excitandi, ut eandem recognoscat, ac certo sciat, se alias eandem tenuisse.

CXXXI. Animæ facultas caeterarum domina est Voluntas. Ejus proprietas tum in Philosophiâ, tum in Theologiâ maximè attendenda, est libertas; Liberam voluntatem humanam fatentur etiam Adversarii; at non eâ libertate liberam, quâ opus est ad rationem meriti, sive demeriti: admittunt enim libertatem a coactione, ut ajunt, non vero a necessitate.

CXXXII. Hinc affirmamus contra Leibnitium, Gravesandum, ac caeteros quoscunque Philosophos veræ libertatis adversores, humanam voluntatem præditam esse libertate tum a coactione, tum a necessitate, cæque prorsus libertate pollere, quam dicunt indifferentiæ.

CXXXIII. At jam statuenda est Animæ immortalitas. Quod ut tutius assequamur, rationibus moralibus, iisque invictissimis evincimus primo; Animæ destructo corpore alteram superesse vitam: deinde rationibus metaphysicis ostendimus, substantiam omnino simplicem, ac per se existentem privari nullatenus posse eâ, quâ fruitor, vitâ, nisi a supremâ causâ, a qua tamen nunquam eâ, quam illi semel elargita est, vitâ privabitur: quibus planè constat, Animam esse immortalem.

CXXXIV.

**CXXXIV.** His ritè demonstratis jam constat, Animam rationalem substantiam esse spirituales, sive verum spiritum: Spiritus autem nomine id venire debet, quod simplex sit, & vim cogitandi, & volendi habeat, ita ut a materiâ ejusmodi vi experte in suo agendi modo, & in sua conservatione nequaquam dependeat.

**CXXXV.** Superest jam, ut aliquid innuamus circa ejusdem Animæ originem. Animam haberi non posse, nisi per creationem evidenter evincit ejus natura prorsus indivisibilis, ac omnino simplex. Ea vero, quæ contra objiciebantur a Catholicis ipsis vetustioribus, a Theologis jam soluta, & ab universali Ecclesiâ jam fuere improbata.

**CXXXVI.** Non prius eandem creari, quam cum corpus, cui unienda est, ad eum organizationis statum devenerit, in quo vitæ functiones possit peragere, inde deducimus, quod quoties illud ad hæc vitæ functiones ineptum evasit, statim ab eodem Anima separatur: ruit ergo hypothesis Leibnitiana, cui malè suffragatur ipse etiam Wolfius.

**CXXXVII.** Statutâ existentia spirituum inferiorum, statuendum jam est, summum extare Spiritum, sive Deum, cui, uti par est, referri volumus studia hæc nostra Philosophiæ naturalis, in ejus gratiam, ac reverentiam eadem, & suscepimus, & prosequuti sumus.

**CXXXVIII.** Deum existere fatentur etiam Spinofistæ, at non alium, nisi Mundum, idest materiam ipsam extensam, & cogitantem, quam proinde volunt necessariam æternam, & a se. Ut ergo terribilissimam hæc, & portentosam hypothesim eâ, quâ convenit, methodo revincamus, ostendimus primo, materiam non esse a se, quod sive evincit ipsamet Materiæ dependentiâ. Ea enim est materiæ inactivitas, ut nequeat ullum sui statum de novo determinare; qui dependentiam non habeat a præcedenti, & a diversis aliorum Corporum circumstantiis: Cum constet, materiam eo modo dependentem esse non posse ens a se, quod, quemadmodum ab essentiâ suâ ad existendum est determinatum, ita nequit alio ente indi-

ge-

gere, & diversos status, quos pro qualibet temporis differentiâ habet, determinandos: & multo minus ab ullo præcedenti statu.

CXXXIX. Ex his consequitur, aliud Ens agnoscendum esse extra materiam, quod eam e nihilo eduxerit, & ad eum statum, in quo est, determinaverit, quod a se erit, & nullo circumscriptum limite; adeoque summè Sapiens, Omnipotens, Simplicissimum, Immensum, Aeternum, summè Liberum, uno verbo cumulus omnium perfectionum, hoc est Deus unus, Optimus Maximus.

CXL. Huic debentur Creaturarum obsequia. Quis enim neget, Summo Bono, primo Parenti nostro, ac Supremo omnium Domino non deberi a rationalibus Creaturis obsequium summi amoris, ac summae servitutis? est ergo necessaria Religio: nec modo ut Deo debita persolvamus, verum etiam ut eum finem ultimum, ac summam eam felicitatem assequamur, quam nobis paratam esse a Mundi constitutione, perspectâ Dei sapientiâ, ac beneficentiâ, ipsâque rationali naturâ, ac humanâ vitâ, ratio naturalis docet.

CXLI. Nec satis nobis erit naturalis Religio, quam contra Deistas affirmamus esse satis imperfectam. Quis enim sibi persuadere poterit, causam adeo sapientem, atque adeo in nos liberalem, quae tantam adhibuit curam corporum nostrorum; Animos, qui sunt multo nobilior pars, immo potissima hominis, quodammodo despexisse, non aliam legem, seu Religionem elargiendo, præter naturalem supradictam?

CXLII. Superest ergo, ut omnino judicemus, aliquam adesse Revelationem, quâ Deus multo uberius se praebeuerit cognoscendum, quam per solam naturalem rationem, de quâ constat, quam hebes ea sit, & imbecilla. Quare cum ipsa etiam naturalis ratio demonstret, media magis apta inquirenda, atque amplectenda ad ultimum assequendum finem; dicendum item, ipsummet naturae lumen ad verae Revelationis inquisitionem, ac pro-

professionem nos ducere. Quam inquisitionem, si instituerit Naturalista jam frugi factus, faciliè deprehendet, eam esse Religionem Catholicam, eamque ultro amplectetur. Argumenta enim, quæ a Theologis passim traduntur, veritatem ejus, ac sanctitatem suadentia, sunt adeo certa, & manifesta, ut eam faciant evidenter credibilem, atque, ut ajunt, credendam,

